

**■ TRIBUNA POLITICA**

# Co statti cun l'economia dal Grischun?

DA JON DOMENIC PAROLINI,  
CUSSEGLIER GUVERNATIV

Ils dis da november ch'èn mintgatant in zic grischs ans dattan in pau temp per far ponderaziuns avant ch'ils dis d'advent hectic cumenzan. Nus ans regurdain d'ina grondiusa stad, essan engraziavel per ils blers dis d'aur d'atun. Naturalmain ma legrel jau oravant tut che questas circumstanzas favuraivlas han gidà a noss hotels, a nossas telefericas ed ad ulteriurs furniturs da prestaziuns turisticas a realisar bunas frequenzas. La tendenza vers ensi ch'è sa manifestada gia avant ha pudì vegnir consolidada uschia. I resta da sperar ch'er l'enviern vengnint ans regalia dis precis uschè bels cun blera naiv e sulegl.

Betg mo en il turissem pudain nus guardar enavos sin in onn da success. Da la conjunctura auta en Svizra ha pudì profitar l'entira economia dal Grischun. Indicators essenzials èn per part s'augmentads uschè ferm sco dapi diesch onns betg pli. Ils exports grischuns da rauba èn s'augmentads durant tschertas fasas per procentualas da duas cifras, numerusas interpresas han investì fermamain, er la dumonda da prestaziuns da construcziun è restada



solida. Uschia na fai betg surstar ch'er l'occupaziun è cleramain stada pli ferma quest onn e che la quota chantunala da dischoccupaziun è restada sut in pertschient durant in entir quartal. Pia, tut en perfetg urden?

U schè simpel n'èsi naturalmain betg. Tenor l'experiencescha èn temps cun ina buna conjunctura adina er in zic privlus perquai ch'els han la tendenza da turblar la vista sin svilupps da lunga durada. L'economia publica dal Grischun demussa vinavant ina clera dinamica sut la media. Gist en las regiuns ruralas ha nossa economia anc adina mo ina debbla diversificaziun. La dependenza dal sector turistic labil resta immensa. Dumandadas èn iniziativas ed innovaziuns tenor principals d'interpresa per schlargiar la basa economica. Perquai na dovran betg mo ils manaschis e las interpresas, ma-

bain er las instituziuns communalas e regionalas en emprima lingia testas finas, in potenzial suffizient da forzas da lavur qualificadas sco er in clima favuraivel per l'economia.

L'unda da pensiunament da las annadas cun in dumber da naschienschas grond che stat davant porta, il dumber da gimnasiastas e gimnasiasts ch'è sa reduci cleramain l'ultim temp sco er il regress tar las relaziuns d'emprendissadi na chaschunan en quest regard displaschaivlamain nagina euforia. Las sfidas demograficas tutgan il territori da muntogna oz cleramain pli baud ed en moda pli dira che las regiuns urbanas, essend che l'immigraziun ha qua ina dimensiun blier pli pitschna e na po perquai betg cum-pensar l'inveteraziun da la societad ch'è gia progredida fermamain en bleras valladas dal Grischun.

Pervia da quai èsi anc pli important da concentrar las forzas avant maun, da drizzar il focus anc pli fitg sin la collavuraziun regionala e da far tut per trair a niz las schanzas che sa porschan – pensain per exempel a las midadas en blers secturs economic pervia da process da digitalisaziun.